

15. maj 2015

Tamat oqartussaaqataanerannut atugassarititaasut pillugit apeqquteqaat aallaavigalugu oqallisissiamik siunnersuut. Ullumikkut aaqqissugaaneq tamat oqartussaaqataanerannik siuarsaasoq atuuppa, imaluunniit tamat oqartussaaqataanerannik nukittorsaataasunik pitsanngorsaasinnaavugut, innuttaasut peqataanerannut, kattuffiit peqataanerannut ilaasortallu inissisimanerannut naleqqiullugu.

(Inatsisartunut ilaasortaq Naaja H. Nathanielsen, Inuit Ataqatigiit)

Siumumiit imaattumik oqaaseqaateqassuugut:

Tamat oqartussaanerata atuutinneqarnera tunngaviusumik ilisimasaqarfigissallugu pingaaruteqartuuvoq, oqaaseq qanoq paasivarpur, qanoq isumaqartillugu atortipparpur, qaqugukkullu atuutinneqarlunilu atuutikkunnaarsinneqartarpa?

Tamat oqartussaanerat isummersorfigissallugu pisariaqartuuvoq, inuiaqatigiittut qanoq tamat oqartussaanerat atorniarnerrippur paaseqatigiiffigalugu ingerlanneqartariaqarmata.

Nunatsinni naalakkersuinikkut tamat oqartussaanerannik aallaaveqartumik aaqqissugaanerput atuutinneqarpoq. Tamatuma tunngaviatigut ima isumaqarpoq qinersinerit sioqqullugu tamat oqartussaanerat tunngavigalugu qineqqusaarnerit assigiimmik tunngaveqarlutik ingerlanneqartarput, kingornalu innuttaasut qinersinikkut amerlanerusut qinigaannik sinniisoqalertarluta.

Siumup tunngavimmigut anguniagaraa innuttaasunut nakkutilliisutut oqartussat tamat tikillugit naliisinnaasariaqartut, taamaattumik inuiaqatigiinni ikittuni tamanna mianeralugu kiffaangissuseqarneq illersorniarlugu oqartussaaqataanerit oqallisigiuartariaqarpagut.

Tamat oqartussaaqataaneranni oqaluserisassat killilersugaangitsumik akisussaaffilimmillu atorneqassasut isumaqarpugut, taamaattorli sumut oqartussaaqataanerilugu ilisimanissaa nalunngitartariaqarparput. Tamat oqartussaaqataanerisa oqaluserinerani pingaaruteqarpoq naapertuilluartumik oqimaaqatigiittumillu paasissutissanik periarfissaqartitsinissaq.

Siumumiit isumaqarpugut inuiaqatigiit nukittuut piginnaasaminnillu atuilluartut tassaasut ilisimasassanik pissarsinissamut ataasiakkaarlutik akisussaaffeqarnerminnik ilisimannittut, soorluttaaq paasissutissanut oqimaaqatigiittumik periarfissaqarnerminnik atuisut, taamaattumik innuttaasut taamak ikitsigaluta pingaaruteqarpoq ulluinnarni tusagassiutit aqutigalugit qanoq paasitinneqartarnerput aammalu qalipaasersorneqartarnerput sunniuteqarfigineqartarmata, ingerlaavartumik tusagassioriaatsinik ilisimasaqarnissarput piunasaqarnissarpullu pisariaqarpoq, aamma tusagassiutit politikikkut oqariartuutunik saqqummiivittut atorneqarnertik oqimaaqatigiittumik periarfissiillutik ingerlatsinertik ingerlaavartumik atuutitissagaat kissaatiginarluni, tusagasseriaasermi mianernartuuvoq peqqissaartumik atorneqanngikkuni piviusumiit allarluinnarmik takutitsilersinnaalluni - aamma piarinaatsoornikkut - mianernarnera pingaartumik inuiaqatigiinni inukittunnguami eqqumaffissaavoq.

Siumumiit kissaatigaarput paasissutissat isorinnissinnaassusillit illuatungeriinillu isummorsorfiusinnaasut tassaasut inuiaqatigiinnut pitsaasumik tamat oqartussaaqataanerannik ingerlatitsiviusut, innuttaasut pisinnaatitaaffigisaat ataqqillugu, nammineq naliliinissaanut paasissutissat atorneqartussaammata.

Oqartussaaqqataaneq aningaasaqarneq kisimi tunngavigalugu isummorsorfigissallugu naammannaanilu tulluanngitsoq isumaqarpugut, taamaaliorutta innuttaasut oqartussaaqqataaneratt pillugu tamakkiisuungitsumik nalilersuilersinnaagatta, innuttaasut qaammaasaqarnerusut anguniartuarnerini pingaaruteqarpoq inersimasut, angajoqqaat, meeqqerivinni, meeqqat atuarfiini, ilinniarfinni utoq-qartatsinni ingerlaavartumik sumiiffinni paasissutissanik pissarsinissamut periarfissaqartitsiuarlunilu periarfissaqartuarnissaq, taamatuttaaq atuakkanik atorniartarfiit, kulturikkullu qaammarsaanissamut periarfissaareersut atorluarnissaat isumaqarpugu pingaaruteqartut.

Siumumiit tamat oqartussaaqataanerat paasineqarlualuni ingerlanneqarnissaa tapersorsorparput, tamannalu mianeralugu inuit akornanni naqisimaneqanngitsumik isummorsorfinnaaneq kiffaangisuseqarnermullu akerliunnginnissaanik qulakkeerinninneq pingaaruteqartoq isumaqarpugut.

Siumup ataqqivaa inuup nammineq eqqarsarsinnaassuseqarnera, nammineq toqqaasinnaasuseqarnera, namminerlu aalajangiisinnaasuseqarnera.

Siumuminngaanniit taamak oqaaseqarluta oqaluuserisassaq soqutiginartoq isummersoqataaffigisavarput.

Suka K.Frederiksen
Siumut